

поне сими бѣдами и досадами повинутся поклонитися папѣ и костелови Римскому; аще же ни и сими досадами имъ не одолѣете, въ темницахъ затворяйте и безъ вины на нихъ налагайте, бійте, безчестѣте и убійте въ имя найсвятшего его папы, прощенье и разрѣшеніе отъ него пріимете, и въ чистцу за то и за вся беззаконія по смерти очиститесь. Видите ли, погубели сынове, за что ради таковой прелестный и поганскій чистецъ собѣ по смерти соградили, яко да погански житіе сего вѣка суетнаго поживше, по смерти въ чистецъ входятъ, изъ чистца зась въ царство небесное выскакують. Вѣру ми ими, папежу и папешнику папешовъ, яко уже съ того чистца по смерти, въ которого праведнымъ судомъ Божиимъ ввержень будеши, въ вѣки выскочити, ни выплынути не можеши, — свѣдѣтель есть самъ Христосъ, глаголя: и идути сѣи въ муку вѣчную, праведници же въ животъ вѣчный. Почто не рече здѣ: досадители и мучители и убійцы идути въ животъ вѣчный, но праведници? А въ плодѣхъ поганскихъ, папежу и ты папешниче, гдѣ есть правда, яви ми оу. Видиши ли, православный христіанине, Латинское правды плоды поганское безвѣріе, мучительскій идолопоклонный нравъ? Видиши ли, яко ты истинный пургаторіумъ въ жизни сей отъ досадъ Латинскихъ пливеши, да очищенъ скорбми и бѣдами достоинъ въ царство небесное ввійти будеши, Латина же досаждающе и заповѣди Христовы дѣломъ разоряюще по смерти въ гееннѣ вѣчнѣй чиститися изволяютъ, но они убо своей прелести да послѣдуютъ и на чистецъ по смерти уповають. Ты же, православниче, въ жизни сей чистецъ изволи про-

плыти, идѣже и твой законоположникъ проплылъ самъ и Ему послѣдующіе ученици, въ которомъ чистцу, доколѣ есмо въ плоти сей, и насъ понуждають и учать, абысмо ся пургговали и чистили, ибо подвигъ велиій настоить, яко плоть, рече, похотствуетъ на духъ, духъ же на плоть, сѣи бо другъ другу противвтася. И паки: яко подобаеъ намъ великими бѣдами и скорбми входить въ царство небесное, рече божественный Павелъ. Еще мало о ложномъ чистцу Латинскомъ речемъ, да отъ всѣхъ страннаго и безобразнаго покажемъ, яко есть ложъ и прелестъ, а не истинна. Аще есть чистецъ по смерти, то гдѣ вѣра, надежда и любовь и храненіе заповѣдей Божіихъ? не любий бо Бога, сихъ не хранитъ, не храняи же не вѣруетъ, не вѣруай же осужденъ есть; не вѣруа бо Сыну, рекшому и научившему и образъ показавшему, не узритъ живота. Аще есть чистецъ по смерти, то почто евангеліе заповѣдей жизни новыя, къ вѣчному животу приводящія проповѣдася, не того ли ради, да ся очиститъ естество человѣческо къ входу царства Божія и геенны діаволу уготованное да избѣжитъ? Явѣ, яко того ради. Видиши ли, православниче, ложный Латинскій чистецъ; видиши ли, Латинниче папешевъ, яко отъ всѣхъ частей вѣры, закона, преданія и благообразія церковнаго и всей соборной и апостолской церкви отсѣкся еси, въ прелести же и лжи валяешися. Но ты убо шествуй съ машкари и комедіями, вы же, православни, истиннѣ послѣдуйте, да истинною въ обителехъ вѣчныхъ водворитесь и радостій неизреченныхъ насладити сподобитесь, ихъ же и наслѣдниками васъ быти Господи сподоби. Аминь.

СОЧИНЕНІЕ ІЕРОДІАКОНА

ПЕЧЕРСКАГО МОНАСТЫРЯ ЛЕОНТІЯ

О ЕРЕСЯХЪ ВЪ ЮГО-ЗАПАДНОЙ РУСИ И ВЪ ПРАВОСЛАВІИ, ПО ПОВОДУ ЯВЛЕНІЯ УНИИ, ИЛИ СОЕДИНЕНІЯ ПРАВОСЛАВІЯ СЪ РИМСКОЮ ЦЕРКОВІЮ.

(1608 года)

Леонтія, іеродіакона Печерскаго монастыря Кіевскаго, сказаніе вкратце о ересехъ тридесяти и четырехъ, ихъ же нынѣшніи отступники митрополитъ Рагоза и владыки нанесли въ церковь Восточную, пріавши вѣру папешскую Западную и благословеніе отъ папежа проклятого, хотячи и прочіихъ завести подъ сѣтъ того, православныхъ христіанъ и увесь причетъ церковный и санъ духовный, оставшихъ при Восточной церкви, приводять до единости погубелной, покрываючи сѣи ереси погубелныя, которіе суть събраны и здѣ до христіанъ ку вѣдомости поданы, для перестроги, въ градѣ Кіевскомъ, въ року отъ сотворенія міра 7116, а отъ воплощенія Христова 1608, яже суть сѣи:

1. Ересь, ⁽¹⁾ еже преступати граници положены отъ Бога чрезъ святыи патріархи, пророки, апостолы и богоносныи отци.
2. Ересь, еже отступати отъ своихъ старшихъ первопрестолныхъ патріарховъ.
3. Ересь, еже отъ папежа благословеніе и хиротонію пріимати.
4. Ересь, еже папежа за чиновачалника всей

церкви, за втораго Мелхиседека, за источника волъ живыхъ, за камня и фундамента, за голову, за найвышшаго пастыря всей церкви, святѣйшого надъ всѣхъ святыхъ, зацнѣйшимъ надъ херувимы, славнѣйшимъ надъ серафимы, за ходатая Богу и Отцу и человѣкомъ, за судію праведнаго и прочая пріимати.

5. Ересь, еже вѣру и всѣ новоустановленные ереси за святости хвалити и пріимати, а святыхъ отецъ, на соборѣ Духомъ Святымъ собранныхъ, уставы и преданія ихъ касовати и отмѣнати позволяти.

6. Ересь, еже о исхожденіи Духа Святаго не токмо отъ Отца, но и отъ Сына визнавати.

7. Ересь, еже полъ одною особою опрѣснка, оплатка тѣло и кровь Христову разумѣти и пріимати.

8. Ересь, еже отпусты и якое есть милостивое лѣто отъ папежа пріимати обходити.

9. Ересь, еже чистецъ душамъ скоро по смерти вѣрити и визнавати.

10. Ересь, еже по новому календару святити всѣ праздники.

11. Ересь, еже еретическіи свята святити.

(1) Слово «ересь» употреблено авторомъ въ смыслѣ обширнѣйшемъ — для обозначенія и обрядовыхъ отступленій и перемены обычаевъ церковныхъ, и различія въ общежительныхъ постановленіяхъ.

12. Ересь, еже впередъ и весполь съ Жиды пасху обходити.

13. Ересь, еже ложныя еретическія мученики почитати и святити.

14. Ересь, еже съ еретики въ церкви и въ костелѣ служити и молитися позволяти.

15. Ересь, еже поученіе творити по евангеліи на святой литургіи.

16. Ересь, еже погребати еретиковъ и по смерти ихъ Бога молити.

17. Ересь, еже съ еретики поимоватися и посагати, куматися, брататися и свататися, ясти и пити.

18. Ересь, еже дѣтемъ православнымъ повелѣвати у еретиковъ сповѣдатися.

19. Ересь, еже пріимати отъ еретиковъ крещеныхъ и поставляти въ причетъ церковный.

20. Ересь, еже (въ) олтарь, еже есть святая святыхъ, еретикомъ и простымъ людямъ входить позволяти.

21. Ересь, еже единому епископіею и митрополіею позволяти владѣти и имѣніе церковное своимъ повиноватымъ, богатымъ давати.

22. Ересь, еже инокомъ мяса ясти и малохорымъ за пѣнзѣ посты на мясояденіе разрѣшати.

23. Ересь, еже посты еретическіе субботные хваляти и пріимати.

24. Ересь, еже съ ересми книги выдавати.

25. Ересь, еже амбоны изъ церкви выкидати и не имѣти.

26. Ересь, еже кучки олтари на улицахъ строити съ кресты ходячи и на нихъ погубелную единость и Казимера черезъ дѣтей разными языки людямъ залецати, за святого и за опатрона възнавати.

27. Ересь, еже о личбѣ папешской отъ сѣтворенія свѣта, яко они пишутъ, такъ вѣрити, якъ бы еще 5599 лѣтъ отъ сѣтворенія свѣта, а не такъ якъ церковь Восточная вѣрити учить и пишеть отъ сѣтворенія свѣта лѣтъ 7115.

28. Ересь, еже духовныхъ въ станѣ малженскомъ честно живущихъ не имѣти, или ихъ

окаявати исповѣдатися и отъ нихъ причащатися брыдитися, яко и папешники брыдятся, а на безбожныхъ хотъ и нечистыхъ и недостойныхъ быти такимъ позволяти.

29. Ересь, еже попомъ двойженцомъ и троженцомъ, блудникомъ и пияницамъ, прелюбодѣемъ и невѣгласомъ неискуснымъ, порочнымъ служити благословити, за мздою.

30. Ересь, еже въ одеждахъ по обычаю мниховъ и езуитовъ строитися и по воли ихъ носитися, капу назадъ закинувши по волоску ся убравши, и такъ ходити позволяти.

31. Ересь, еже отъ еретиковъ святочніи подарки или перепои пріимати и съ Жиды съ еретиками любви творити.

32. Ересь, еже расширати колѣнопреклоненіе въ субботу и въ недѣлю или въ Господскіи праздники, по повелѣнію папешскому изволяти.

33. Ересь, еже обѣты или присеги и рукъ своихъ подписы подъ анаевою святыхъ отецъ, клятвы свои, еже не отступати отъ соборныя апостолскія церкви, отъ патріархъ и ихъ благословенія обѣщавшися, а нынѣ все поправши подъ ноги, во ересехъ и въ судодѣянїихъ, въ отступленїихъ, отчаянїи, въ соблазнахъ, нерадиве безъ покаянїя и исповѣданїя, погубелнѣ, а не спасителнѣ жити изволяти.

34. Ересь, еже души по смерти праведныхъ въ небѣ, въ оныхъ вѣчныхъ отъ Христа помеченныхъ обителехъ нынѣ быти възнавати, яко уже явственнѣ получили и тамо въ оныхъ языкомъ неизреченныхъ и ухомъ неслыханныхъ радостехъ, якъ бы уже ся веселили, а грѣшныхъ паки въ гееннѣ въ мукахъ быти възнавати.

Внимайте, правовѣрніи, отъ зловѣрныхъ, для Бога, пилне стережитесь ихъ. Не прїидеть лукавнуай, не пребудуть же законопреступници предъ очима твоима. Возненавидѣлъ еси вся творящая беззаконїя и погубивши вся глаголющая лжу: мужа крови и лстива гнушается Господь. Гробъ отверсть гортань ихъ, языки сво-

ими лщяху; суди имъ Боже. Не сѣдохъ съ сомномъ суетнымъ и съ законопреступными не внїйду, возненавидѣхъ церкви лукавнующихъ и съ нечестивыми не сяду. Боже, прїдоша языци въ достоянїе Твое, оскверниша церковь святую Твою.

Ненавидящая ли Тя, Господи, возненавидѣхъ и о вразехъ Твоихъ истаяхъ, совершенною ненавистїю возненавидѣхъ ихъ, во враги быша ми. Быша же и лживи пророци въ людехъ, якоже и въ васъ будутъ лживы учителя, иже внесуть ереси погубели, искупшаго ихъ владыки отмѣтающесе, приводяще собѣ скору погубель и мнози послѣдствуютъ ихъ нечистотамъ, ими же путь истинный похулится и въ преумноженїи лстивыхъ словесъ васъ уловятъ, ихъ же судъ искони не коснитъ и погубель ихъ не воздрѣмлетъ. Вѣсть Господь благочестивыя отъ напасти избавляти, неправедники же въ день судный мучими блюсти, наипаче же въ слѣдъ похоти плотскія скверненїя ходящихъ и прочая. И Господа нашего долготерпѣнїе спасенїе нещуйте, якоже и возлюбленный нашъ братъ Павель, по данней ему премудрости, написа вамъ, якоже и въ всѣхъ своихъ посланїихъ глаголя въ нихъ о сихъ, въ нихъ же суть неудобъ разумна нѣкая, яже ненаучени неутверждени развращаютъ, якоже и прочая писанїя къ своей погубели имъ. Вы же убо, возлюбленїи, прежде видяще, хранѣтесе, да не лестїю незаконныхъ сведени бывше, отпадете своего утвержденїя.

Возлюбленїи, не всякому духу вѣруйте, но искушайте духи аще отъ Бога суть, яко мнози лстивые пророцы видоша въ мїръ. Сїя есть заповѣдь, якоже слышасте исперва, да въ ней ходите, зане мнози лестци внїдоша въ мїръ. Вы же, возлюбленїи, поминайте глаголы прежде реченныя отъ апостолъ Господа нашего Исуса Христа, зане глаголаху вамъ, яко въ послѣднее время будутъ ругатели, по своихъ похотехъ ходяще и нечестїихъ, сїи суть отдѣляюще себе отъ единности вѣры и

Акт. Южн. и Зап. Россїи. Томъ II.

суть тѣлесни духа неимущи. Вы же, возлюбленїи, святою вашею вѣрою назидающе себе Духомъ Святымъ и молящесе, сами себе въ любви Божїей соблюдайте, ждуще милости Господа нашего Исуса Христа въ жизнь вѣчную. Открываетъ бо ся гнѣвъ Божїй съ небесе на всяко нечестїе и неправду чловѣческу, содержащихъ истинну въ неправдѣ, занеже разумѣвше Бога, не яко Бога прославиша или благодариша, но осуетишася помышленїи своими и омрачїся неразумное ихъ сердце, глаголющесе быти мудри обюродѣша (хотя ся всегда философіи учать, а еднакъ въ ересехъ живутъ и погубаютъ) и измѣниша славу нетлѣннаго Бога въ подобїе образа тлѣннаго чловѣка, якоже видите, або слышите о папешу окаянномъ, яко его Рымляне величаютъ, до костела у клѣтцѣ на собѣ носятъ. Кто не вѣритъ, по иди до Рыма, — узришь самъ.

Повѣсть правовѣрныхъ о ересехъ старыхъ и новыхъ въ церковь Господню нынѣ нововнесеныхъ черезъ отступниковъ ложныхъ епископовъ, которїи суть ясне писанїемъ злѣ объявени и въ личбу, колко ихъ собрахъ, суть написаны, для ихъ скрѣпной неправды и для тайной и явной ихъ зрады, которою незлобивыхъ прелщаютъ, ничего нового не указуютъ, все, мовятъ, по старому въ церкви въ насъ отправуется: якоже и у васъ, звонимъ, читаемъ, конархаемъ, поемъ, кажемъ, кадимъ, служимъ, погребаемъ, ни въ чомъ ничего не отмѣняючи, ани жадное ереси не придаючи, якъ насъ помовляютъ патріаршане. Такъ ловятъ правовѣрныхъ у вѣрѣ неутвержденныхъ суптелне. Але читайте, правовѣрніи, повѣсть сїю, и вы, кривовѣрніи, отступници отъ Руси, новые еретици, обачите ересь не едину, але до тридесять и до четырехъ. Въ той книжцѣ толко, а што у иншихъ книгописцовъ, о которыхъ я, яко простакъ, не вѣлаю, понеже разныхъ языковъ не умѣю, одно такъ якъ имъ тутъ написалъ Рускимъ языкомъ и для вѣдомости вѣрнымъ подалъ, которое писмо, або вѣсть

сію ласкаве приймайте и за мнѣгасло собѣ мѣйте, да готови къ отвѣту будете.

1. Первая ересь, еже преступати границѣ, замеронныя и положенныя отъ Бога черезъ патриархи, пророки, апостолы и святыи отцы на седми соборахъ вселенскихъ и на помѣстныхъ. Ересь есть, еже наступати на чужую паравію позволяти и гвалтомъ или условно находити, до ересей папезскихъ христіанъ приворочати силою. Яко антихристъ чинити будетъ, тое уже папезъ нынѣ починаетъ дѣяти презъ слугъ свои, нѣколися пастырей намъ бывшихъ, нынѣ отъ насъ изшедшихъ и отступившихъ, о которыхъ апостолъ Павелъ въ дѣяніихъ такъ прорекъ, мовячи: азъ бо вѣмъ се, яко по отшествіи моемъ внидутъ волци тяжци въ васъ, не щадяще стада, и отъ васъ самыхъ встанутъ мужіе глаголюще развращенная, еже отторгати ученики въ слѣдъ себе. Такожъ Іоаннъ Богословъ о тыхъ отступникахъ Духомъ Святымъ прозрѣлъ съ початку написалъ такъ: дѣти, послѣдняя година есть, якоже слышасте, яко антихристъ грядетъ; и нынѣ антихристи мнози быша, и отъ сего разумѣваемъ, яко послѣдній часть есть. Отъ насъ изыйдоша, но не бѣша отъ насъ, аще бо быша отъ насъ, пребыли убо быша съ нами, но да явятся, яко не бѣша вси отъ насъ. Досытъ яснѣ указуютъ тыхъ нашихъ отступниковъ нынѣшнихъ, о которыхъ и самъ Христосъ на тестаментѣ своемъ выразилъ явнѣ, которыхъ ся пилно стеречи казалъ тыми словы: внемлѣте же отъ лживыхъ пророкъ, иже приходятъ къ вамъ въ одеждахъ овчихъ, внутрь же суть волци и хищницы, отъ плодъ ихъ познаете ихъ. И далей, на самый конецъ вѣка сего, о тыхъ пастырехъ лживыхъ Христосъ избавитель изъ своими учениками такъ розмвлялъ. Изшедъ Иисусъ, идыше отъ церкви и приступиша къ Нему ученици Его показати Ему зданія церковная, Иисусъ же рече имъ: видите ли вся сія? Аминь, глаголю вамъ, не имать остати здѣ камень на камени, еже не разорится. Сѣ-

дящу же Ему на горѣ Елеонстей, приступиша къ Нему ученици на единѣ, глаголюще: рещи намъ, когда сія будутъ, и что есть знаменіе Твоего пришествія и кончина вѣку? И отвѣщавъ Иисусъ, рече имъ: блюдѣте, да никтоже васъ прелститъ; мнози бо придутъ въ имя Мое, глаголюще: азъ есмь Христосъ, и мнози прелстятъ, услышати же имате брани и слышанія бранемъ, зрите, не ужасайтесь, подобаетъ бо всѣмъ симъ быти, но не тогда есть кончина; встанетъ бо языкъ на языкъ и царство на царство и будутъ глады и пагубы и труси по мѣстомъ, вся же сія начало болѣзнемъ. Тогда предадутъ вы въ скорби, и убіютъ вы, и будете ненавидими всѣми языки имени Моего ради, и тогда съблзнятся мнози и другъ друга предадутъ и возненавидитъ другъ друга, мнози лжепророци встанутъ и прелстятъ многія, и за умноженія беззаконія изсякне любви многыхъ; претерпѣвый же до конца той спасется. Тогда, аще кто речетъ вамъ: се здѣ Христосъ или онде, не имѣте вѣры, встанутъ бо лжехристи и лжепророцы, и дадутъ знаменія и чудеса, якоже и прелстити, аще възможно, и избранныя. Се прежде рѣхъ вамъ: се въ пустыни есть; не изыйдѣте, се въ сокровищехъ, не имѣте вѣры. А зали не есть то все предъ нами, и зали мало ли сварокъ и не выдаютъ ли на смерть, на баницію другъ друга? Зри, смотри и внимай собѣ всемъ, блюдетесь лжепророковъ папезниковъ и иныхъ еретиковъ, новыхъ же пророковъ владыкъ и митрополитовъ, новыхъ еретиковъ — не мы, аю декрета святыхъ такъ ихъ зовутъ.

Въ правилехъ писано есть такъ о томъ, что есть еретикъ? Собора вселенскаго втораго, иже въ Константиѣ градѣ правило второе: предѣлъ ради, никто же да смѣшаетъ церковь, ни поставляетъ презвитера, ни епископа, сущая же въ языцехъ Божія церкви святыхъ отецъ обычай да держится. Яко еретикъ есть и еретикимъ подлежитъ закономъ и мало что уклоняся отъ православныя вѣры. Видите,

для преступленія границъ есть еретики такіи. А иже папезъ наступуетъ на паравію патриаршую, есть еретикъ, и тотъ, хто отъ него хиротованъ, еретикъ есть. Также до того, ижъ гвалтомъ или силою панскою есть поставленъ, рекомо митрополитомъ, а таковаго правило святыхъ апостолъ 1-е скидаеть зъ стану того — такъ есть писано. Ижъ силою властель епископъ поставленъ былъ, да извержется и отлучится. Тожъ: аще которой епископъ мирскими властели избранъ бывъ, и тѣхъ силою приметъ церковь Божію, рекше епископъ будетъ въ ней, таковой, яко велико прегрѣшеніе согрѣшивъ, да будетъ изверженъ и да отлучится и проч. Досытъ имаете. Просимъ обачтеса явныя ереси, якъ видите, отъ которыхъ отстанте, да ся спасете.

2. Другая ересь, еже отступати отъ своихъ старшихъ первопрестолныхъ патриархъ, отъ которыхъ вѣру православную спасительную и благословеніе святое зъ начала, за монархи великаго Владимера приняли, нынѣ отъ тыхъ отстали и до папежа пристали; декрета святыхъ апостолъ и богоносныхъ отецъ такихъ скидаеть станъ. Святыхъ апостолъ правило такъ написано есть: безъ вины отторгнувыйся епископа и ину поставивъ церковь, и съ приѣмшими его да извержется. Аще ли который презвитеръ безъ вины епископа своего оставитъ, не познавъ того согрѣшивша, что въ правовѣрїи или въ которой правдѣ, и отшедъ и соборъ людій о себѣ собралъ и церковь другую сътворитъ, — да извержется яко властолюбець, самъ же и съ послѣдовавшіи ему причетници, простїи же да отлучатся. Таковой же союзъ долженъ есть прїяти, аще не обратився лваши или трици помиловашу его епископу его. Еще грань 70 концу собора 1 и 2 въ Константиѣградѣ правило 15. Аще ли епископъ или митрополитъ отъ своего патриарха отступити дерзнетъ, своего святительства нагъ да будетъ. А то видите, ижъ прости суть люде отступникъ мнвмый, нарицаемый отъ папезниковъ

митрополитовъ и кривоприсяжци владыкове новыи папезскїи и вси иные имъ равны суть, которїи отступниковъ послѣдуютъ подъ сіи декрета подпадаютъ иже предѣлы святыи претворяють страшнѣйшїи тыхъ декретовъ есть сей декретъ отъ Бога презъ Моисея поданный тыи слова: проклятъ, иже претворяеть предѣлы подруга своего и да рекутъ вси люде: будутъ.

Страшный декретъ для Бога досытъ, престанте претворяти предѣлы, вы отступници; хочете ли не подпасти подъ остатній декретъ въ день страшнаго суда Христова, кгдажъ маете о то пересторогу отъ писанія святого. Соломонъ мовитъ: не прилагай предѣлъ вѣчныхъ, яже положиша отци твои и не блазѣте болше людей лживыми науками своими еретическими, не мовте, ижъ мы ничего новаго въ церковь не внесли. А за жъ не новое: отступити отъ патриарха своего, отъ которого презъ Володимера монархи всего языка Рускаго крещеніе и спасеніе приняли, водлугъ котораго крещенія до сего часу такъ вѣрили, якъ съ початку прїняли и отъ тыхъ патриархъ Константинопольскихъ митрополитове Кїевскїе, якъ кройвики Русскїе и Полскїе и иные, также и привелїа старїе королей Полскихъ, Руси наданыя, свѣдчатъ.

3. Нынѣ же тая третья ересь выникла у отступниковъ, иже отъ папежа ново благословеніе хиротонїю брати окаянїи позволили, который папезъ отъ всѣхъ патриархъ для гордости его есть отѣченый, якъ гнилыи члонокъ одинъ отъ тѣла и есть вымазанъ съ книгъ поменныхъ, и есть проклятъ презъ патриархъ многыхъ, о которомъ отверженію окаяннаго папежа ниже въ шестой ереси знайдешъ. Толко просимъ: не крыйте предъ простыми людьми тыхъ новыхъ нынѣ въ церковь презъ васъ внесенныхъ ересей погубелныхъ; а тежъ хотяи бысте и найбарзѣи крыли, не укрьете, бо самъ Христосъ мовилъ тыи слова: нѣсть бо тайно, еже не явлено будетъ, ниже утаено, еже не познается и

въ явленіе прійдетъ. И зали не явна есть тая новая у васъ ересь, благословеніе отъ еретика папежа брата, а тыхъ, што отъ патріарха благословеніе пріимуютъ, то проклинати? Але не прокленете, бо есть правило третее вселенского собора третьего, иже въ Ефесѣ, же еликого еретикъ клинеть, тотъ священъ есть, а кого онъ посвящаетъ, тотъ есть не священъ.

4. Не досыть же отъ папежа благословеніе брата, але и за чиноначалника, за архистратига, надъ всѣхъ духовныхъ и святыхъ старшого быти первейшаго, пастыра пастыремъ и всѣмъ головою видимою, хоть нигдѣ зриму столици не бываетъ, предсе такъ визнавати и вѣрити, иже всей вселеннѣи есть видимою головою; не досыть, але и фундаментомъ всѣмъ церквамъ и каменемъ угольнымъ и однородному Сыну Божию единою равнымъ и иродломъ воль живыхъ, святъ надъ святыми, славнѣйшій надъ херувимы и серафимы, Мелхиседекъ вторій, ходатая Богу и человѣкомъ, судію праведнаго, и кто съ нимъ не збираетъ, тотъ растаетъ. Такъ пишете вы, отступники. А зали то не новая ересь въ церковь вами внесена, и зали не наплюгавили есте церквей тыми ересми?

Не знаю, чимъ болшимъ еще хочете церковь сквернити надъ тые ереси Богу и всѣмъ святымъ и людемъ добрымъ мерзеннѣйшимъ, которіи досыть суть спросни, еже человѣка плюгаваго, внутрь червей гаду полного, Сыну Божию, Богу чинити равного и вси титулы папежу привлащати Бога несмертнаго? А еднакъ смѣете мовити, ижъ нѣсть въ насъ нового ничего. Охъ, охъ, охъ, Боже, доколѣ терпиши поругаемъ, ихъ таковыми ересми попираемъ. Але подобно тотъ то, которого апостолъ Павель вѣрнымъ стеречися пилне казалъ; къ Солуняномъ такъ написалъ: молимъ же вы, братіе, о пришествіи Господа нашего Иисуса Христа и нашемъ снитіи о немъ, яко не скоро подвижатися вамъ отъ ума, ни ужасатися ниже духомъ, ниже словомъ, ни посланіемъ яко отъ насъ посланнемъ, яко убо настойтъ день Христовъ.

Да никтоже васъ прелститъ ни по одному же образу, яко еще не прійдетъ отступленіе прежде и открытєся чловѣкъ беззаконію, сынъ погыбели, противникъ и превозносяйся паче всякаго глаголемаго Бога или чтилища, якоже ему сѣсти въ церкви Божіи аки Богу, показуя себе, яко Богъ есть. Досыть явне и яснє того и съ того папежа указалъ. А за не есть отступленіе, а зали не величавитя надъ всѣхъ святыхъ и не равняетъ ли ся Иисусу Христу Богу, якъ вышше читалемъ книги того фалшу и той трутизны и хулы суть полны.

5. Иже вѣру и вси новоуоставленны отъ папежа ереси за святости хвалити и пріимати, а святыхъ, на соборехъ Духомъ Святымъ събранныхъ уставы и преданія касовати, отмѣнати позволити, а за то не ересь? И зали не указалъ Христосъ и апостоли въ тыхъ часехъ остатныхъ такихъ стеречися, которые бы иначе учили, нежели святыи? Певне и подъ анаеомою заказали, и такъ апостоли и святіи отци написали. Святого Никона слово 65. Чуждуся, яко тако скоро прелагаются отъ звавшаго вы благодатию Христовою въ ино благовѣствованіе, еже нѣсть ино, точію нѣціи суть смущающе вы и хотяще превратити благовѣствованіе Христово, но и еще мы или аггель съ небесе благовѣститъ вамъ паче еже благовѣствовахомъ вамъ — анаеема да есть. Якоже предъ рекохомъ и нынѣ паки глаголю, аще кто вамъ благовѣститъ паче, еже пріясте — анаеема да есть. Отъ събора соединенна, бывшаго при Константиѣ и Романѣ царехъ, правило: вся чрезъ церковная преданія учителства и въображенія святыхъ и приснопамятныхъ отецъ творимая и содѣянная или посемъ содѣятися хотящая — анаеема. Зле папежу будетъ, иже онъ претворяетъ ухвалы святыхъ и за ништо ихъ маеть, за тое злый декретъ такъ написанъ тогожъ собору правило: иже въ небреженіи полагающимъ священная и божественная правила божественныхъ отецъ нашихъ, иже святую церковь подпираютъ и все христіанское

жителство украшающе къ божественному наставляють благоговѣнію — анаеема. И еще: аще угодныхъ богоноснымъ отцемъ поколѣбить что, не къ тому се смотреніе нарецаемъ, но преступленіе и преданіе велѣнію и къ Богу нечестіе. Видите, якъ заказано есть преданія святыхъ нарушати, а вы тому противитєся, новыи речи вымышляете. Для Бога покайтеся, да сего проклятїя святыхъ ухранитєся.

6. Еже о исхожденіи Святаго Духа отъ Отца и отъ Сына, а не токмо отъ Отца по оправданію самого Христа и апостолъ Его святыхъ и по узаконенію святыхъ богоносныхъ отецъ, иже на второмъ вселенскомъ соборѣ, — нынѣ учити въ церкви по папежску, реку же по еретическу почали есте вы, отступники. А еще мовити нового ничего въ церковь не внесли есмо, отмовляетеся, иже еще вѣрую въ единого Бога такъ читаете по стародавнему, якъ есть писано, то есть отъ Отца исходящаго Духа Святаго. А чемуужъ на казанїяхъ своихъ и на лыспутацияхъ и отъ Сына учите вѣрити и мовити Духу Святому исходити, и на писмѣ зъ лруку почали есте такъ выдавати, для которой ереси патріархове папежа отвергли отъ себе, съ поменика вымазали и проклиали. О томъ зъ лруку есть выдано колко книгъ, ижъ для той ереси розорваня стало ся наперодъ. Для Бога покайтеся да спасетєся.

7. Ересь, еже подъ одною особою, то есть въ оприсноку тѣло и кровь Христову, а не въ хлѣбѣ и у винѣ, якъ самъ Христосъ подалъ, вѣрити и пріимати на отпушеніе грѣховъ и жизнь вѣчную. А за то не новая ли ересь нынѣ въ церкви унеслася такъ вазнавати и пріимати такъ позволяти? О душегубители, Христа продатели и лжеучители, покайтеся, да спасетєся! И вы, людіе, не прелщайтєся лживымъ благословеніемъ еретическимъ, кгдажъ отступниковъ благословеніе не есть благословеніе. Такъ свѣдѣтельствуєтъ правило 32 собора Лаодикійскаго, еретическое благословеніе — неблагословеніе. Тол.: благословеніе убо здѣ просви-

ра нарицается; тѣмже не подобаетъ прїяти якъ благословенія отъ еретикъ проскомисанныхъ проскуръ, не благословеніе бо есть паче тѣхъ благословенія. Людіе прелщенные здѣ собѣ внимайте; которые у отступниковъ проскуръ ся причащаете, нынѣ врозумляйте, аще очищеніе грѣховъ и жизнь ложною тайною одержите.

8. Еже отъ папежа отпусти якоесь милостивое лѣто пріимати и обходити новѣмъ перемонїями, которое обходили Городенскїе попы и иншіе по селехъ и по мѣстечкохъ покутныхъ, то чинили року 1605, а зали то не новая ересь въ церковь унеслася? А еднакъ мовите ничего нового у насъ не машъ. Перестанте лгати.

9. Еже чистецъ душамъ по смерти быти вѣрити визнавати, такъ учити, якъ бы тамъ чистятєся и поколко десять и поколко сотъ лѣтъ, и вычистившися яко бы до неба идуть, што есть явная неправда, ложъ, бо писма о томъ истотнаго не мають, зъ мечтовъ или изъ явленнїи сновъ старчихъ, съ притчъ, а не изъ истоты указуютъ, криво писма выкладають и наши съ ними отступники, а еднакъ ничего нового не повѣдають. А то не новая ересь? Покайтеся!

10. Еже по новому (календарю) позволити святити (праздники), а по старому покинути, такъ лживо учити, а за то не новая ересь? Покайтеся да спасетєся!

11. Ересь, еже еретическіе папежскїе праздники вси зъ ними обходити и праздновати позволили, а зали то не новая ересь? Покайтеся!

12. Ересь, еже уперодъ и весполъ съ Жиды пасху обходити праздновати позволити, и сего року 1606, што уперодъ Жидовъ за 4 недѣли была обхожана пасха папежская, Потей и писмомъ ухвалилъ въ лыспутациіи своею, которую подписалъ лыспутацию, якъ братскїи братъ зъ берестеницею десь лыспутовалєся. А ижъ ухвалилъ, то власне якъ святилъ, для того подпалъ подъ тотъ декретъ апостолскїи: аще кто епископъ или презвитеръ или діаконъ святой день пасхи прежде времени съ Юдеи празднуєтъ, да извержетєся, и прочая. Покай-

теся, зле написавши, исповѣдайтесь, да спасетесь.

13. Ересь, еже ложные мученики почитати еретическіе, иже не за православную вѣру скончались, и на то отступники позволили, и здѣ у Вилни съ кресты на Сшествіе Святаго Духа, отъ церкви до церкви черезъ мѣсто ходячи, образъ Казимира пѣякого, въ календару старомъ и новомъ неслыханого намалевавши, носили, и тому ся, яко Христовому образу поклоняли. Для чого подъ сей срогій декретъ святыхъ отецъ окаяннѣи подпали: собора въ Лаодикии прав. 34 также писано есть: еже живыя еретическія мученики почитаетъ, да будетъ проклятъ. Тол.: аще кто яко истинныя мученики ложныя еретическія мученики почитаетъ, иже не за православную вѣру скончавшася и тужды суть отъ Бога: есть и самъ да будетъ проклятъ. Покайтесь, да спасетесь!

14. Ересь, еже съ еретики въ церкви и въ костелѣ служити, и имъ на томъ же престолѣ оприснокомъ служити повелѣвати и съ ними молитися учить такъ мѣшатися. А зали то не новая ересь? Для чого полпадаютъ вожеве слѣпѣи подъ сей декретъ апостолскій: моляйся съ еретики, да отлучится. Аще же яко причетники прииметь я, да извержется. Тол. Епископъ или презвитеръ, или діаконъ, аще помолится токмо съ еретики или въ дому или въ церкви, да отлучится; аще ли повелитъ служити въ церкви якъ презвитеромъ, или ини что отъ священныхъ съдевати, яко причетнику, таковыи да извержется. Не мовте жъ, иже ничего нового у васъ не машъ: а то все у васъ есть, што ся выше написало. Не мовте: не вадитъ съ еретиками молитися. Видите, ижъ вадитъ, станъ свой тратитъ, а кто ся не покаеть, тотъ и спасеніе свое тратитъ, якъ и тотъ, што ходилъ до розныхъ церквей мало не стратилъ души, о чомъ писано есть у пролозѣ, мѣсяца декабра пятого.

15. Ересь, еже поученіе творити въ святей литургіи по евангеліи, што ся значитъ попра-

ніе святой литургіи, умерщвеніе или искорененіе живой жертвы. А зали то не новая ересь въ церкви? Зъ начала есть предано по святей литургіи поученіе творити, для того и написано есть мовити на концу, яко поемъ и читаемъ: да исполнятся уста наша пѣнія Господня похвалы, яко да воспоемъ славу Твою, яко сподобилъ еси ихъ, Боже, причаститися святыхъ Твоихъ таинъ и насъ, Боже, съблюди въ Твоей святости по вся дни поучатися правдѣ Твоей. Аллилуіа.

То видите, ижъ по святой литургіи святыми предано есть люди учить, а не по евангеліи, яко Патѣи мутижъ отъ папежа научившися. Не мовте жъ, што ничто нѣсть у васъ нового. Покайтесь, да спасетесь!

16. Еже погребати еретиковъ и на тыхъ погребохъ бывати и надъ ними пѣти и тыхъ поминати и по нихъ звонити. А зали то не новая ересь то чинити? А еднакъ мовятъ, ничего нового не внесли есмо въ церквѣ. Есть писано, по геретикохъ умершихъ не творити памяти. Декретъ святыхъ апостолъ Петра и Павла 14 такъ свѣдѣтельствуеть: за нечестиваго бо, аще и всего міра богатство раздаси нищимъ, никоя же ползы не сътвориши ему. Ему же бо живу сущу, врагъ бѣ Богу; явѣ есть и по смерти, ибо нѣсть неправда отъ него. Праведенъ бо Господь и правду возлюби, и се человекъ и дѣло его.

17. Ересь, еже съ еретики куматися, свататися, брататися, посагати, ясти и пити у нихъ и у единомъ дому жити и смѣшатися съ ними позволяти. А зали то не противно есть церкви святой паче же Богу? Много о томъ есть писма, же ся не годить съ еретиками всего того вышпомененого творити. Богъ черезъ пророки, Христосъ черезъ апостолы, Духъ Святой черезъ святые отцы заказалъ вѣрнымъ отъ невѣрныхъ отлучатися. Такъ мовилъ Богъ до Моисея пророка: да не смѣсися съ ними и богомъ ихъ да не завѣщаеши завѣта и да не остануть на земли твоей, да тебе не сотворять

согрѣшати къ мнѣ. Аще бо работаеши богомъ ихъ, сіи будутъ тобѣ на соблазнъ. Тотъ заказъ нынѣ наши бывшіи епископы зламали, бо ся папежу и его болваномъ рытымъ поклонили, для сѣдалищъ у радѣ мірской. Тогожъ не допустили, а честь отъ своихъ стратили, и есть имъ папежъ на соблазнъ. Христосъ паки апостоломъ реклъ: блюдѣтеся, да никтоже васъ прелститъ, мнози бо придуть въ имя Мое, глаголюще: азъ есмь Христосъ, и многи прелстятъ. Духъ Святой святымъ отцемъ подалъ се о брацѣ еретикъ, сирѣчь о сватѣствѣ къ правовѣрнымъ, собора иже въ Лаодикии прав. 10: со еретики въ сватовство не входитися. Тол. О сей вещи различная правила повелѣвають, ихъ же сказаніе въ 14-мъ правилѣ, иже въ Халкидонѣ собора написахомъ и доволна суть реченная тамо на истолкованіе сему правилу. И еще тогожъ собора правило 31: не подобаетъ еретикомъ даяти на сочитаніе чадъ своихъ, но поимати, аще христіани быти обѣщаются и совокупляя на общеніе брака сыномъ своимъ; а еже даяти христіаномъ дщерь свою на сочетаніе еретикомъ въ многихъ правилахъ отреченно есть. Иоаннъ Златоустый страшно написалъ въ тые слова: слышите вси вы, еже со еретики въкупѣ ядущіе болезненнаго сего отвѣта, яко вы Христовы врази. Иже врагомъ царевымъ другъ есть, сей не можетъ другъ царевъ быти и жити недостоинъ есть, но съ враги погыбнетъ и горшая муки подойметъ. Послушайте паки, иже съ ними любящеся, како имате убѣжати гиѣва грядущаго на нихъ, иже съ ними сквернящеся въ яденіихъ и питіихъ? Или не слышите Павла блаженнаго вопіюща, яко не можете чашу Господню пити и чашу бѣсовскую. Изыйдѣте отъ среды ихъ и къ нечистому не прикасайтесь. Послушайте, православніи, и съ еретики не смѣшевайтесь, да не сведени будете въ вѣчныя муки съ ними. Отступники и неотступники съ еретиками сполечники, внимайте собѣ.

18. Ересь, еже дѣтемъ правовѣрнымъ пове-

лѣвати у еретиковъ исповѣдаться для внѣшнихъ наукъ на стѣблану и прелесть своихъ братіи, у вѣрѣ правой не утвержденныхъ; и для сего лукавства ихъ погыбають многіе. А мовилъ Христосъ: иже аще соблазнитъ единого малыхъ сихъ вѣрующихъ въ Мя, уне ему есть да обѣсится жерновъ оселскій на выи его и потонетъ въ пучинѣ морстей. Горе міру отъ соблазнъ, нужда бо есть приити соблазномъ; обаче горе человекъу тому, имъ же соблазнъ приходитъ; и по малѣ: блюдѣте, да не презрите единого отъ малыхъ сихъ; глаголю бо вамъ, яко ангели ихъ на небесехъ выну видятъ лице Отца Моего небеснаго. Апостолъ Павелъ о тыхъ мудрыхъ и о мудрости человекъчестей такъ до Коринтоянъ написалъ: писано бо-есть, погублю премудрость премудрыхъ и разума разумныхъ отвергуся; гдѣ премудръ, гдѣ книжникъ, гдѣ съвопросникъ вѣка сого? не убили Богу премудрость міра сего. Понеже бо въ премудрости Божіи не разумѣ міръ премудростию Бога, благоизволи Богъ буйствомъ проповѣданія спасти вѣрующія; понеже бо Юдее знаменія просятъ и Еллини премудрости ищутъ, и прочая. Нынѣ отступники и отъ насъ симъ многіе уподобилися, иже также едини чюдовъ просятъ, другіи премудрости ищутъ у еретиковъ, для подпоры рекомо церкви, а якъ вижу мало подпирають што ся по латинѣ учили, але еще тѣи горей разоряють церковь и напаствуютъ болше нижъ простаки. Написалъ Сирахъ о премудрости душеспасительной и о простотѣ пожиточной тѣи слова: всяка премудрость страхъ Господень и всякія премудрости сотвореніе закона, лучше есть умалаяся разумомъ пристрашенъ, нежели избытчествоуй мудростию и преступаяй законъ. То видите, што тотъ лѣпшую мудрость указываетъ намъ надъ всякую мудрость человекъскую. Еретики всегда учатся, якъ апостолъ мовить, а николи въ разумъ истинный не могутъ приити, таки у ересехъ живутъ. До сый о томъ.

19. Ересь, еже приимати отъ еретиковъ кре-

щенныхъ и поставленныхъ въ причетъ церковный также и самое крещеніе ихъ и мшу. На тое декретъ святыхъ апостолъ, такъ написано есть: крещеніе и жертву еретическую приеъмъ, святитель не священъ, епископъ или пресвитеръ или діаконъ, аще не похваляетъ и не ругается еретическому крещенію, но приеъмлетъ крещенаго отъ нихъ или приносимаго отъ нихъ на жертву, сирѣчь на службу приеъмлетъ, таковой да извержется отъ сана. Кое бо съчетаніе Христови къ диаволу или кая часть вѣрному съ невѣрнымъ. И другій декретъ святыхъ отецъ собора Лаодикійскаго, прав. 33, такъ написано: съ еретики и съ отвергшимися отъ соборныя церкви да не помолится никто; аще помолится кто съ еретики или съ отвергшимися своею волею соборныя церкви, самъ да отлученъ будетъ. Еретики жъ глаголются, иже о вѣрѣ блзняются и согрѣшаютъ. Отлучившіяся отъ соборныя церкви сіи именуются Авдіане. Иже убо вѣру имѣють якоже и соборная церкви, множайшіи же отъ нихъ въ монастырехъ пребываютъ и съ всѣми на мѣстѣ не молятся и хулятъ епископы наша, богатства рали, другія ради иныхъ винъ, и со Юдеи пасху особно творять, имѣють же нѣкія особныя распря, недомыслимыя словеса божественнаго писанія неправо сказующе. Много тымъ Авдіаномъ уподобилися и наши отступники, едакожъ ся што тую жъ рекома вѣру мають, едакожъ ся также о вѣрѣ той блзнять, по папезску вѣрити починають. Покайтесь, да спасетесь.

20. Ересь, иже у олтарь, еже есть въ святая святыхъ простымъ и еретикомъ позволяти входить, на поносъ и поруганіе и на попраніе всѣхъ святостей и на оклетаніе тайны Господня. Яко маете пѣти оную пѣснь, которую поють въ постъ: вечера твоей тайны днесъ, Сыне Божій, причастника мя приими, не повѣмъ бо врагомъ Твоимъ тайны Твоея, и прочая. А яко не повѣдаешь, коли бискупи и сами сѣдятъ у олтари, а другіи около тебе крутятся, коли ся

причащаешь? Обачтесе и покайтесь, и зъ своими поеднайтесь, да спасетесь.

21. Ересь, еже единому епископію и митрополію владѣти и имѣніе церковное своимъ кровнымъ мірекимъ раздавати святыхъ апостолъ декрета претятъ. Читайте собѣ собора Халкидонскаго прав. 10 и 12 и прочіихъ святыхъ о томъ, яко не мають повиннымъ своимъ богатымъ и своеволне безчинне живущимъ давати зъ маестности церковное, што колвекъ убогимъ и своимъ волно дати яко убогому.

22. Ересь, еже инокомъ мяса ясти разрѣшати и позволяти въ посты также и малохорымъ мясо и рыбу здоровымъ ясти и вино албо медъ довольно пити, на чревоугодіе благословити и позволити. А за то не ересь? И велика. Абовѣмъ для того невоздержанія Адамъ и Ева рай стратили, а иніи потопъ навели на себе, иныхъ земля ядущихъ и піющихъ пожерла. Страшніи декрета святыхъ такъ суть написаны на тыхъ, которіи посты разрѣшаютъ. Святій Никонъ такъ написалъ. Паки иже о средахъ и о пяткохъ всего лѣта и о святей четверодесятниці въ прав. святыхъ апостолъ прав. 69 сие бѣ управлено, глаголай: аще который епископъ, или пресвитеръ, или діаконъ, или чтець, или пѣвецъ святую четверодесятницу не поститъ и всяку среду и пятокъ, да извержется, развѣ аще немощію тѣлесною възбраняемъ есть; аще ли отъ простыхъ людей, да отлучится; и сие убо божественніи апостоли управивша и узаконивша. По тѣхъ же, иже въ Ангрѣ святіи отци божественнымъ духомъ събрани отъ всѣхъ въкупѣ, иже отъ святыхъ апостолъ уставленныхъ постѣхъ и еже потомъ законныхъ съ областію всякою въ 18 и 19 правилѣ страшно отвѣщаша, глаголюще сие: аще кто отъ постящихся кромѣ тѣлесныя нужда разгордится и преданія посты въ общину и хранимыя отъ церкви разрѣшаетъ цѣлу сушу въ немъ и совершенну помыслу, анаѣема да будетъ. И паки, иже божественніи отцы просвѣщшеса въ различныхъ книгахъ изложиша о сихъ по-

стѣхъ съ тѣми же свѣтили церковными; и Аполосъ великій въ отцехъ всѣхъ съгрѣшеніи страшнѣйше глаголетъ, яко съборныя посты невозможно быти разрѣшати, кромѣ великія нужда; въ среду бо Христосъ проданъ бысть, въ пятокъ же распятъ бысть, иже убо сія разрѣшася, сей предаетъ Спаса и распинаетъ.

Заправды и велми речъ тая страшна и ужасна. Отнынѣ не разрѣшайте среды и пятка, а ни всѣхъ постовъ не разрѣшайте, на чревоугодіе не благословляйте. Иноци мясо ясти покинте, бо брашна не поставять предъ Богомъ, але отдалять.

23. Ересь, еже посты еретическіе, суботный постъ и виліи папезскіе ухваляти, за святые посты приимати позволяти. А зали то не ересь? Не противни ли постомъ святыхъ, же ихъ покинули, то есть апостолскіе и святыхъ отецъ посты на соборехъ узаконены, на которыхъ разорителей, якъ видите, декрета страшніи, и еще декретъ святыхъ апостолъ, на постящихся въ недѣлю или въ субботу, такъ написано есть: аще который причетникъ постится въ недѣлю или въ субботу, кромѣ единыя великія субботы, да извержется; аще же мірскій человекъ есть, да отлучится.

24. Ересь, же съ ересми книги друковати, въ листѣхъ неправду писати, подъ церковь соборную подкидати ложныи книги, на соблазну и на развращеніе православныхъ. Исаія пророкъ на тыхъ такъ написалъ: горе пишушимъ неправду. О семъ правило Халкидонское о лживыхъ книгахъ.

25. Ересь, еже амбона или камня на средѣ церкви не имѣти, на немъ же евангеліе діакони читають и святителя убирають, о которомъ амбонѣ въ толковой службѣ святіи отцы такъ свѣдѣтельствуютъ: амбонъ есть гора равна по пророку, рече бо: на горѣ равнѣ возносѣте знаменіе; знаменіе же есть святое евангеліе, свѣщеносна обаполы суть ангели сѣдѣвшіи у главы и у ногу въ гробѣ Господни. Или паки: амбонъ есть отваленый камень отъ двери гробу, діаконъ. Акт. Южн. и Зап. Россіи. Томъ II.

конъ же на амбонѣ ангелъ есть, сѣдѣвый на немъ близъ дверей гробовыхъ и въскресеніе проповѣдаый мирноносцамъ, кандила же суть воины, стрегущей гроба. Видите, яко красній доводъ о амбонѣ. О семъ соборъ Лаодикійскій прав. 33 и седмаго собора правило 14, которого за повелѣніемъ папезскимъ выкинули съ церкви. Початокъ то еще и знакъ есть изверженія всѣхъ святостей, отъ апостолъ, паче же отъ Христа преданныхъ и святыми отцы на соборехъ взаконеныхъ догматъ пустошеня церкви есть. А едакожъ окаянніи смѣють мовити, ничего нового въ церковь не внесли.

Обачтесе, для Бога, и покайтесь соблазнятѣ, гдыжъ горе тому, имъ же соблазны бывають. покайтесь!

26. Ересь, еже кучки олтари на улицахъ строити, съ кресты ходячи и на нихъ погыбелную едностъ и Казимира черезъ дѣтей розными языки людемъ залецати. А за то не ересь, но нова ли речъ кугкловати, визерунокъ отъ еретиковъ брати, или изводити себе дати, по воли ихъ творити, человекуюгодникомъ быти позволити. Охъ намъ, ижемо ся дождали дній лукавыхъ, пачеже людей превротныхъ, пастыровъ фалшивыхъ, пророковъ неправдивыхъ, лжеучителей, горкихъ мучителей, лжехристовъ, антихристовъ, лжемиротворцовъ. Ты, Христе Боже, мовилъ: не мните бо, яко придохъ въврещи миръ на землю, не придохъ въврещи миръ, но мечъ, придохъ бо разлучити человекъ на отца своего и дщерь на мать свою и невѣсту на свекровь свою, и врази человекъ домашній его. А нынѣшніи пастырь якуось едностъ залецаютъ. Тіи то подобно суть, о которыхъ пророкъ Іеремія пророковалъ и давно написалъ тыи слова: отъ меншаго пасты (въ паствѣ) даже до болшаго вси сребролюбію учатся и отъ пророка до священника вси творять лещъ. Исцѣляху сотренія дщерей людій моихъ съ лестію рекуци: миръ и не бѣ миръ. Горшіи непокой повсталъ межи людами за увѣною, ниже коли ей не слыхати было. Гро-

зять Богъ тымъ лжемиротворцомъ черезъ Іезекіиля пророка, такъ мовячи: и увѣдять, яко Азь Аданай Господь, имъ же прелегшиа люди моя, глаголюще миръ, миръ, и не бѣше мира. Што жь есть? То есть, што упередъ мовиль тотъ же пророкъ: поищеша мира и не будетъ, люто до люта будетъ, и вѣсть до вѣсти будетъ, и възыщется видѣніе отъ пророка и законъ погыбнетъ отъ жерца и свѣтъ отъ старца. А за нынѣ не есть такъ судѣтеса сами, да не съ миромъ осуждени будете.

27. Ересь, еже о личбѣ папежской отъ сотворенія свѣта, яко они пишутъ, такъ вѣрити: якъбы еще 5599 лѣтъ отъ сотворенія свѣта, а не такъ, якъ церковь Восточная вѣрити учить и пишеть отъ сотворенія свѣта лѣтъ 7115. А за то не новая ересь у отступниковъ? А еднакъ мовять, нѣчого нового у насъ нѣтъ. Покайтесь такъ мовити, бо не утаите тыхъ великихъ и такъ явныхъ ересей, бо ихъ книги многіи свѣтчатъ о нашей личбѣ, же такъ есть, якъ мы пишемъ 7115 лѣтъ отъ сотворенія свѣта. Трудно имъ то утаити и затлумити, бо ясне апостолъ Павелъ до Галатовъ о томъ выразилъ и такъ написалъ: егда приде кончина лѣту, посла Богъ Сына своего едиnorodнаго, раждаемаго отъ жены. То видите, ижъ на концу вѣкъ родилъся Христосъ. А прото злѣ то чинять папежники, ижъ такъ много лѣтъ уняли, што ся значить способъ оногo антихриста, который мѣлъ лѣтъ на прелесть уняти, о которомъ Данилъ пророкъ ясне написалъ тыи слова: и по нихъ встанеть другій, иже преспѣеть злобами вся, иже прежде его, и три цари смиритъ и словеса къ Вышнему съглаголетъ и святыя Вышняго смиритъ и помыслить перемѣнити времена или законъ. Такъ и папежь помыслилъ премѣнити времена, и такъ разумѣлъ, же станется, якъ помыслилъ и лѣтъ унялъ для того. Атакъ стережѣтеса, бы то не тотъ былъ, который южъ и законъ новый весь разоряеть, науку Христову и святыхъ апостолъ декрета и богоносныхъ отецъ каноны поницовалъ и поотмѣнялъ, по

воли своей, якъ самъ схотѣлъ. Апостоли безъ совѣта сполечного не чинили ничого, яко свѣдѣлствуютъ дѣянія святыхъ апостолъ о обрѣзаніи и необрѣзаніи, обрѣзались или ни.

28. Ересь, еже духовныхъ въ станѣ малженскомъ честно живущихъ не мѣти; или ихъ окаявати исповѣдатися и отъ нихъ причащатися брыдятся, якъ и папежники брыдятся; а на безбожныхъ хоть и не чистыхъ и недостойныхъ быти такимъ позволить. А зали то не ересь? Страшный декретъ на такихъ собора, иже въ Гангрѣ: аще разсуждаеть отъ презвитера бракъ приобщившагося, яко не подобаетъ служивши ему причащенію примати, анаеема да будетъ.

29. Ересь, еже попомъ двоженцомъ и треженцомъ, блудникомъ, піаницамъ, прелюбодѣемъ, невѣгласомъ, неискуснымъ, порочнымъ служити благословити за мздою, и зали то не ересь? Декрета святыхъ такихъ скидають зъ степеня. Василія Великаго декретъ такій: священници же и діакони, въ коемъ либо блуднемъ согрѣшеніи повинни суще, аще и единою паденіе будетъ, никакоже къ тому да служить, да причащаютъ же ся неосужденно, егда хотять и четца чинъ да имуть. Святыхъ апостолъ о двоженствѣ читай декретъ, албо правило 17: а кто вдовицу понялъ и служить... Читай правило 18: ктобы и по невѣдомости съ осквернившуюся оженилъ. . . Читай правило 26 вселенскаго 6-го собора, а прочитавши, справтеса по правиломъ святымъ. Апостолъ написалъ: сами ся судити, абыхмо отъ инныхъ, паче же отъ Христа не осуждены были. И для того такъ написалъ: аще бо быхомъ себе разсужали, не быхомъ осуждены были, судими же отъ Господа наказуемся, да не съ міромъ осудимся. Апостолъ Петръ написалъ: и кто озлобитъ васъ, аще благому подобници будете. Аще протопопове или попове безчинне и незаконне оженившися, отъ женъ отлучитеса, также и попове двоженцы, понявши вдовици и дѣвици, отъ нихъ отлучитеса, и въ ере-

сехъ папежскихъ не будете. И кто васъ озлобитъ? Певне никто отъ человекъ, ни отъ самыхъ патриархъ, аще благому подобници будете.

30. Ересь, еще въ одеждахъ, по обычаю мниховъ и изунтовъ строитеса, по воли ихъ носитеса, капу назадъ закинувши, и по влоску ся убравши, и такъ позволить ходити. А зали то не ересь? Гордость діавола новыи строй вымышляти. Апостолъ Петръ написалъ, не одежда озлобитъ человекъ, тыи слова, или одѣяніемъ ризъ лѣпота, но потаенный сердца человекъ, въ неистлѣніе кроткаго и молчаливаго духа, еже есть предъ Богомъ многоцѣнно.

31. Ересь, еже отъ еретиковъ святочиии подарки или перепои примати и съ Жиды и съ еретиками любви творити. А за то не ересь? Апостолъ Іаковъ написалъ: не вѣсте ли, яко любви міра сего вражда Богу есть; иже бо восхощетъ другъ быти міру, врагъ Божій бываетъ. Также и святые отци написали, собора Лаодикійскаго прав. 37: съ Юдеи и съ еретики никто да не празнуеть, и да не примуть еже глаголется отъ нихъ праздничная. Тол.: нѣсть никоегоже общенія свѣту къ тмѣ; сего ради убо христіаномъ съ еретики или съ Юдеи ни примати яже въ празники ихъ творять, якоже се опрѣсноки или что таковое. За антихриста будутъ посылати другій до другого подарки, по смерти Іліи и Еноха, радуячися, ижъ южъ не будутъ ихъ въ грѣсехъ обличати и упоминати. Іоаннъ Богословъ такъ о томъ написалъ: и живущи на земли возрадуются и возвеселятса о нихъ, и дары послють другъ ко другу, яко оба сія пророка мучаста живущая на земли. Есть и нынѣ того много на свѣтѣ, и отступники мало бы того не учинили, еслибы братства церковныи одолѣли. Певне бы одинъ до другого подарки великии послали, яко и нынѣ чинять, перепои посылають. Покайтесь, да спасетеса!

32. Ересь, еже разрѣшати колѣнопреклоненіе въ субботу и въ недѣлю и въ Господскія празники, аще не въ церкви, но въ костелехъ

по велѣнію папежскому творити; святіи отцы претягъ колѣнопреклоненіе въ субботу и въ недѣлю и въ празники Господскія творити. Такъ написали: въ недѣляхъ не прекланяти колѣну отъ богоносныхъ отецъ мы пріяхомъ, Христово почитающихъ въскресеніе, яко убо да не вѣмы явственно сего соблюденіе явѣ вѣрнымъ устроаемъ, яко да по еже въ вечеръ субботный и священныхъ къ олтару входу подражающему обоняя никомуже колѣну поклонати даже до утрнего недѣльного вечера, въ немъ же по вечернемъ входѣ, паки колѣна поклоняюще сие Господеву молитвы приносимъ, Спаса бо нашего востанію предтеча начинаемъ на свѣтъ отъ тмы празникъ приводяще, якоже отъ сего въ совершенней ноци и дни торжествовати на въскресеніе. И еще у уставѣ церковномъ указъ о постѣ святыхъ апостолъ сие: отъ пятка вечеръ поклоны оставляются, въ субботу бо и въ недѣлю не повелѣно поклоновъ творити до земля, но токмо до пояса, такъ якъ и въ всю пятидесятвицу. Не прекланяйте колѣну въ субботу и въ недѣлю и на празники великіи; а въ иныи дни не занежайте, папежникомъ ся не уподобляйте, святыхъ уставъ стережете и такъ ся спасете.

33. Ересь, еже обѣты или присяги и рукъ своихъ подписы, подъ анаеомою святыхъ отецъ клятвы свои еже не отступати отъ соборныя апостолскія церкви отъ патриархъ и ихъ благословенія обѣщавшися, а нынѣ, все поправши подъ ноги, въ ересехъ и въ студолѣяніихъ, въ отступленіи отчаяниѣ, въ соблазнахъ нерадиво, безъ покаенія и исповѣданія погыбелнѣ, а не душеспасителнѣ жити изволили окаянии, не хотять, якъ видимо встати и отколь вищли вернутися. На сію ересь много есть страшныхъ декретовъ, пописанныхъ въ божественномъ писаніи, черезъ пророки, патриархи старозаконныи, болей тѣхъ въ новомъ завѣтѣ черезъ самого Іисуса Христа, Сына Божія, Бога нашего мовлены, и черезъ святыхъ апостолъ

и через богоносныхъ отецъ на соборехъ вселенныхъ и помѣстныхъ написаны, ихъ же кто въ небреженіи полагаетъ и о нихъ не радить, или еще и хулить, отъ нихъ же мало здѣ соборахъ на увѣщанія сихъ тако свидѣлствуютъ. Правило сее отъ собора съединенія, бывшаго при Константинѣ и Романѣ царехъ прав. святаго Никона слово 63. Вся чрезъ церковнаго преданія учителства и въображенія святыхъ и приснопамятныхъ отецъ новотворимая и содѣлнная или по семъ содѣлнятся хотящая, анаѳема. Иже въ небреженіе полагающимъ священная и божественная правила божественныхъ отецъ нашихъ, иже святую церковь подпираютъ и все христіанское житіе украшающе, къ божественному наставляють благоговѣнію — анаѳема. Аще кто угодныхъ богоноснымъ отцемъ поколебитъ что, не къ тому се смотрѣніе нарецаемъ, но преступленіе и преданіе велѣнію и къ Богу нечестіе. Внимайте, которіе правила святыхъ ламете, или инако претворяете и преступаете, паче же которыи кривилами называете, внимайте себѣ. До того святой Никонъ написалъ, ижъ сужени будутъ преступники святыхъ правилъ. Божественное слово святымъ своимъ ученикомъ и апостоломъ заповѣда, глаголя: шедше научѣте вся языки, крещающе ихъ въ имя Отца и Сына и Святаго Духа, учаще ихъ блюсти вся, елика заповѣдахъ вамъ. И паки рече: яко отмѣтайся Мене и не пріемля глаголы Моя имать судящаго ему слово, еже глаголахъ, той судить ему въ послѣдній день. И паки глаголетъ: егда прійдетъ Утѣшитель Духъ истинный, иже отъ Отца исходитъ, онъ вамъ вспомянетъ глаголы Моя, понеже убо святой утѣшительный Духъ ради спасенія нашего божественныхъ совокупи святыхъ отецъ соборы и едину волю Отца и Сына утверди и съ областію всякою божественная правила усты святыхъ отецъ изволи сихъ и хотящей неволею истязаны бываемъ творити; аще ли ни, всихъ судими будутъ преступающе. Не преступаете

ли вы, отступники, въ тыхъ всѣхъ правилехъ и не есте ли въ ересехъ тѣхъ всѣхъ вышешомененыхъ. Аще выполняется писаніе все, паче же пророчество; Исаія о сихъ написалъ: кождо въ свой путь уклонишася въ развращенная, отъ перваго даже до послѣднего; и паки яснѣй: стезя бо ихъ разкривлены, по нихъ же ходять и не видять міра; чаявшимъ имъ свѣта, бысть тма, ждавши зари, въ тмѣ походиша, яко възнеможе въ путехъ ихъ истинна и правымъ не возмогоша пріити. О во истинну не возмогоша; мовять бо, якъ мы маемъ отступити отъ присягы и отъ подписовъ рукъ своихъ, обѣщалися доказати, то есть до послушенства папешкаго всѣхъ привести, чего не доказали. А то еще сила Духа Святаго боронитъ и не допускаетъ еретиковъ церковію владѣти, на што вы отступники, сіе видячи, зло вашей клятвѣ отступите, и яко Петръ апостолъ плачется, Героду злочестивому и безумному не уподобляйтесь, выполняй злую обѣщаницу. Але боюся, бы то не о васъ, отступники, пророкъ Іеремѣя мовилъ: сынове безумніи суть и бѣспіи мудри суть да сотворяютъ злая, благо же творити не познаша, доброе сотворити, отъ злого ся уклонити не умѣте. Въ томъ законопреступленіи безпечне живете, якобы никгда не умрете, а не досыть што сами погыбаєте, але еще и другихъ до тоежъ погыбели тягнете. Для Бога обачтесе, покайтеся, да спасетесе. Абовѣмъ грозитъ злѣ Богъ черезъ пророки и декреты святыхъ якъ видите. И еще Исаія пророкъ страшно мовить до васъ власне отступниковъ: горе, чада отвергшесе, се глаголетъ Господь, сотвористе совѣтъ не Мною и завѣты не духомъ Моимъ, приложити грѣхи къ грѣхомъ. Іеремѣя мовить: обратитесь единъ кождо отъ пути своего злого и исправѣте пути ваша и помышленія ваша. То видите, до васъ отвергшихся мовять пророци, бо есте ся вы отвергли патриархъ святыхъ, отъ которыхъ продкове ваши и вы сами съ початку вѣру Христову и

благословеніе и все спасеніе приняли есте, евангеліе и весь законъ Божій, которій нынѣ попираете, раздрушаете и приступаете, и все новое по малу малу отъ гордаго законопреступнаго папежа пріимуете. А писано было, якъ есте вышше читали, не отступати отъ своихъ старшихъ, также границъ и закону святыхъ не преступати; а высте преступили все, якъ есте тутъ ся явне оказали. Соломонъ написалъ: не чистъ бо предъ Господемъ всякъ законопреступникъ, клятва Господня въ домохъ нечестивыхъ. Исаія написалъ: горе беззаконному, злая бо приключаются по дѣломъ его. И еще: горе преступникомъ, иже преступили суть законъ. Сирахъ написалъ: горе вамъ, мужіе нечестивіи, иже остависте законъ Вышняго, и аще родитесе, на клятву родитесе, и аще умрете, клятвѣ раздѣлени будете. Все, елико отъ землѣ въ землю поидеть, такожде нечестивіи отъ клятвы въ пагубу. Боюся бы не отъ оной, которую Матѳеѣй евангелистъ написалъ, а власныя слова Христа Бога нашего ти: не всякъ глаголай ми Господи, Господи, ввійдетъ въ царство небесное, но творяй волю Отца Моего, иже есть на небесехъ. Мнози рекутъ Миѣ въ день онъ: Господи, Господи, не въ Твое ли имя пророчествовахомъ и Твоимъ именемъ бѣсы изгонихомъ, и Твоимъ именемъ многы силы сотворихомъ. И тогда исповѣмъ имъ, яко николиже знахъ васъ; отидѣте отъ Мене дѣлающей беззаконіе. И еще: тогда речеть сущимъ ошую его: идѣте отъ Мене, проклятїи, въ огнь вѣчный, уготованный діаволу и аггеломъ. Страшный декретъ, отъ котораго Боже уховай васъ и насъ, толко жъ то слово на васъ злое абовѣмъ выражаетъ явне, што мовить проклятїи, то певне ти, што законъ преступали и што претворяли и што правила кривилами звали, за што которїи подъ анаѳему подпали, якъ есте вышшей декрета ти читали. А прото, мовлю, боюся о васъ, поневажъ вы нынѣ подъ многїи анаѳема святыхъ правилъ подпали. А вѣдаете и чи-

таете евангеліе Христово тое, гдѣ мовить Христось: пріимѣте Духъ Святы; имъ же отпустите грѣхи, отпустятся имъ, а имъ же держите, держатся; а иже ти святїи Духомъ Святымъ собрани на соборехъ были, и то што Духъ Святы имъ подаль подъ анаѳемою держати и справоватися всѣмъ подали, якъ есте вышшей о томъ святаго Никона науку и правила святыхъ апостолъ и святыхъ богоносныхъ отецъ читали досыть ясне описаны, подъ которїи вы, отступники, небожята подпали. А такъ, Христа ради, молимъ васъ и упоминаемъ сими свидѣлствы писанія святаго, якъ братїю свою, обачтесе, въ тыхъ ересехъ не живѣте и не помирайте у клятвѣ святыхъ. Бога ради, пачеже себе ради, нынѣ ся покайте, отколь вышлїстесе, вернѣтесе, да возрадуются ангели на небесехъ о наверненїи вашемъ, и мы ужики ваши, отъ васъ Духомъ Святымъ разлученїи на ползу и спасенїе ваше, да возвеселимся, узрѣвше возвращенїе и обрѣтенїе ваше и да воздамо купно хвалу Богу нашему въ Тройци славимому, Отцу и Сыну и Святому Духу. Аминь.

34. Ересь, еже души по смерти праведныхъ у небѣ, въ оныхъ вѣчныхъ, отъ Христа помененыхъ обителехъ нынѣ быти визнавати, яко южъ явственнѣ получили, и тамо въ оныхъ языкомъ неизреченныхъ и ухомъ неслыханныхъ радостехъ, якобы вже ся вселили; а грѣшныхъ паки въ геенѣ въ мукахъ быти визнавати, а не такъ, яко церковь святая писаніемъ святыхъ праведныхъ души въ рай учить быти вѣрити и визнавати намъ предала, грѣшныхъ же паки въ адѣ затворены и лукавыми бѣсы блудомыхъ, якоже пишеть о сихъ сице. О праведныхъ не притчею, ниже видѣнемъ, ни знаменіемъ коимъ, ниже въ снѣ, но явственнѣ и существеннѣ Христось Богъ повелѣ быти души праведно вопїюща къ Христу разбойника, еже помянути его въ царствїи, но Христось противу отрекъ: днесъ съ мною будещи въ рай. Такъ и вси святїи на всякъ день въ церквахъ

пѣти на блаженнахъ предали, якоже и поемъ. Снѣди ради изведе изъ рая врагъ Адама, креста же ради разбойника введе Христосъ въ оны. И еще молимся: ликомъ святыхъ сочetaй, Боже, иже вѣрно отъ житія пришедшая и рая жителя сотвори за неизреченную милость. Златоустый Иоаннъ о восхищеніи святаго апостола Павла до третіяго небесе и до рая такъ толкуеть albo выкладаеть. О преложеніи. А иже въ рай рече писаніе, то и се Павелъ держати творя умудраеть и сказуеть ему души праведныхъ, прежде бывшихъ въ райстей пищи и благодати пребывающіи отъ невидимыхъ силъ, со всякимъ благочестіемъ и въ той благодати суще болша ожидаютъ, еже жити съ Богомъ, то есть у небѣ, идѣже неизреченная та и невзглаголанная словеса слышавъ и дерзну рещи: иже теченіе совершихъ и вѣру соблюдохъ, предлежитъ тому вѣнецъ отъ Бога. Пространнѣйше въ 8 главѣ тако написа: въ спадшаго чина мѣсто десятого умысли Богъ сотворити человекъ, да свѣтлость и вѣнци спадшихъ предати имать Богъ правовѣрнымъ, и нарицаетъ чинъ десятый человекълюбезный, но якоже указоваеть намъ божественное писаніе, глаголюще: иже бо пострадала за имя своего Владыки святіи пророци и апостоли, святители и праведнѣи ликъ мученичскій, то тѣи не уллуча обѣтованія отъ Спаса; о нихъ же великій Павелъ глаголетъ: аще многа томленія и искушенія святіи пріаша, но аще и чудесь дѣлатели сподобашася быти ли въ ракахъ лежаще мира истачають, ли костію влагомъ, или власомъ, или платомъ рызъ своихъ бѣсы изгонять, но сія убо быша послушествовани вѣрою, но не пріаша, рече Павелъ, обѣтованія или обѣщанія, но токмо обѣтованіе уллуча славы тоя неизреченныя вѣнца пріати, якоже и свѣдѣтельствуеть Павелъ, глаголя: Богу о насъ нѣчто болше прозрящу, да не безъ насъ тѣи совершатся, Богу наипаче убо о человекѣстѣ родѣ промышляюще и ожидающе послѣднихъ. Да того ради грѣшници

трепещуть дне того, въ оны же имать судити Богъ, да геенѣ и муцѣ страшнымъ предани будутъ, праведници же радуются о дни томъ суднемъ, имъ же пріемше обѣтованіе и ждуть совершенія, да совершени суще отъ Владыки Христа, въ ангелскій чинъ вступльше Господу предстануть у небѣ тамъ, гдѣ вси радости. И еще тоже о раю глаголетъ: крестомъ бо разбойникъ отверзе рай входя, къ нему же убо приступающе не погрѣшихомъ райскія пища, тому и херувимъ уступися, сему древу съ пѣніи поклоняются. Согласуется съ сими свѣдѣтелствы и святый Аѳанасій. Вопросъ Антиоха князя 18: гдѣ хоцѣмъ убо глаголати, якъ суть нынѣ предвариша душа человекская? Отвѣтъ Аѳанасіевъ: странно убо и страшно есть въпрошеніе се и отъ человекъ утаенно, не попусти бо Богъ возвратитися отъ тамо сущихъ кому къ намъ исповѣдати, гдѣ и како суть, яже отъ насъ отшедшія душа; обаче, якоже отъ писавій навикнуемъ, яко грѣшныхъ убо въ адѣ пребываютъ подъ всею землею и моремъ, якоже глаголетъ псаломникъ: въ темныхъ и сѣни смертвѣи и въ ровѣ преисподнемъ; якоже въ Іовѣ пишеть: въ земли темнѣи и мрачнѣи, въ земли тмы мрачныя, идѣже нѣсть свѣта, ниже зрѣти жизни человекскія; праведныхъ же души, по Христовѣ пришествіи, якоже отъ разбойника, иже на крестѣ навикнуемъ, яко въ рай суть, ея бо ради единыя душа святаго разбойника Христосъ Богъ нашъ рай отверзе, но и всѣхъ ради прочіихъ душъ. И еще тыхъ же вопросъ 19: что убо пріашали праведнѣи благая и грѣшнѣи муку? Отвѣтъ: никакоже; паче сія радость, якоже имуть праведныхъ душа отчасти наслажденіе имъ есть, яко и грѣшници въ скорби суть, имуть отчасти, сице и праведници. И якоже царь призываетъ другы своя, еже обѣдовати съ нимъ, такожь и осужденники, имѣя въ темници еже мучити ихъ и еже убо на обѣдъ комуждо ихъ къ собѣ влекуще нозди ихъ видѣніе. Егда ли повѣнетъ духъ хладенъ, и абіе свѣшумятъ

древеса та съ тихостію звучнѣи шумвнѣемъ благовоище дыхающе вѣяніемъ. И въ Маргаритѣ также написано есть слово о раи 4-е: на земли Златоустый кажетъ есть рай и нынѣ; досыть ясне указалъ. Не досыть ли на томъ? И еще и на другого доводъ святаго Аѳанасія такій маеть: вопросъ Антиоха: како рече Моисей: Тигръ и Евфратъ и Еонсонъ отъ рая исходитъ, яже рѣша нѣци отъ Армѣнскихъ горъ истекающая. Отвѣтъ Аѳанасія. Тигръ и Евфратъ и Висонъ, по истиннѣ, отъ рая исходита, скрываетъ же ся подъ земными проходы, начало паки пріемлюща отъ горъ Армѣнскихъ. Се же сотвори Богъ человекскаго ради смотрѣніа; аще бо быша слышали подземныи проходы нескрываети окушались, важили бы ся человекы рай донти, и погыбли бы быша долготы ради пустыниа и брашенъ недостаткомъ, или въ звѣри впадающе, или въ иныя великія бѣды. О то видите есть рай не затопленъ потопомъ, яко Израиль въ раздѣленіи или средѣ моря въ изшествіи изъ Египта. А такъ не мовте, ижъ въ небѣ суть души праведныхъ притчами, виденми или фигурами и съ нами и похвалами. Разбойникъ же въ злодѣхъ и мужехъ убійцахъ бѣ, пришедшу же пятку Іюда отиде въ тму кромѣшнюю, разбойникъ же съ Христомъ вселися въ рай. Такъ и по проскомидіи мовимо: троп.: въ гробѣ плотски, въ адѣ же съ душею яко Богъ, въ рай съ разбойникомъ, на престолѣ бѣше Христосъ съ Отцемъ и Духомъ, исполняя вся неописаннѣи. Если речеть кто: Богъ потопомъ затопилъ рай; о чомъ явне читалъ, а о томъ, ижъ есть тотъ рай и теперъ цѣль — тогда изъ сихъ свѣдѣтелствы явне тотъ рай разумѣти мусить кожый. А если кто на сихъ не перестанеть, а тожь и еще маеть свѣдѣтельство святаго Іоанна Златоустаго, въ бытіяхъ толкуеть слово 20: И насади Господь Богъ рай въ Едемѣ на Востоцѣ; Едемъ же убо сказуеться пища благовоища и благоцвѣтная, разно зраки и воня подающая, пища безпечальная, веселящія умъ и

сердце, пища утѣшенія и покоя, пища утѣшенія несказанна, еже насади десница его; суть убо въ немъ внутрь дрѣвеса красна и цвѣтна и высоко верхи своими украшени и вѣтвми своими прекланяющеса долу; тажъ вся насажденіемъ равно и лѣпотою и видѣніемъ, имъ же плодъ и листвѣе николиже не увядаетъ; другія же цвѣты отъ нихъ благовоище подають безпрестани добротою и красотою и видѣніемъ страннымъ, якоже не лзе ихъ обрѣсти благовоищѣиша и многоцвѣтна виденія. Призыванію въ радости суть предъ домомъ царевымъ, дожидаящи даже до часа обѣднѣаго, осужденники же въ темници затворени въ печали суть, дондеже изыйдетъ суди. Сице прочее подобаетъ разумѣвати, о иже нынѣ тамо отъ насъ предваршихъ душахъ, глаголю же праведныхъ и грѣшныхъ. То видите явне, ижъ души праведныхъ въ раю суть, а не въ небѣ, а ни тежъ пріахли оны неизреченныя радости, але чястку, яко о томъ святый Аѳанасій выразилъ, згожающися зъ иными святыми. Яко тежъ и святый Василій Великій въ церкви положилъ молитву на всякъ день мовити и молитися такъ: Владыко Господи Іисусе Христосе Боже нашъ, долготерпѣи о нашихъ согрѣшеніихъ, даже и до нынѣшняго часа приведи насъ, въ оны же, на животворящемъ дрѣвѣ вися, благо разумному разбойнику иже въ рай путь сотворилъ еси входъ. Але речеть кто: ижъ не въ тотъ рай, съ котораго Адама изгналъ Богъ, бо того потоппъ затопилъ; я мовлю: чѣмъ же Христосъ противне отказалъ разбойнику на крестѣ, который молился, абы помянулъ его Христосъ въ царствіи, але Христосъ отказалъ ижъ днесъ будешь со мною въ рай? Такожь и на всякъ день въ церкви поемъ, яко въ вышше написалъ; также о то иныи святыи согласуются, иже въ рай суть въ томъ, съ котораго Адамъ былъ выпалъ. И еще Аѳанасій святый у отвѣтѣ 231 такъ мовитъ: Іюда предатель, свѣтающе четвѣртку съ Христомъ и съ ученики его бысть.